

## Dine Buchnabu

Worom hesch du e so ne schöne Buchnabu?  
Und mine gsehd us wie ne Chnopf, gopf!

De Jan dä hed en tüüfe, do cha de Dräck verschlüüfe.  
D'Moni hed en chline und bim Max gsehsch fascht ine.

Doch jede esch es Original und es esch doch total egal, wie n'er usgseht,  
Hauptsach er isch zue!

Worom hesch du e so ne schöne Buchnabu?  
Und mine gsehd us wie ne Chnopf, gopf!

De Buchnabu vo de Sandra hed es goldigs Ringli dra, zur grosse Freud  
Vo ihrere Mama!

Au ehre esch es Original und es esch doch total egal, wie n'er usgseht,  
Hauptsach er isch zue!

Worom hesch du e so ne schöne Buchnabu?  
Und mine gsehd us wie ne Chnopf, gopf!

Ech säg der dä vom Geri gseht us wie nes Beerli! D'Leni hed en weiche, bleiche  
Und de Fritz nume en Schlitz.

Und jede esch es Original und es esch doch total egal, wie n'er usgseht,  
Hauptsach er isch zue!

Worom hesch du e so ne schöne Buchnabu?  
Und mine gsehd us wie ne Chnopf, gopf!

Eis wott ech no wüsse, bevor ich goh is Bett, wer mir mine zueknüpft hed!

Au mini esch es Original und es esch doch total egal, wie n'er usgseht,  
Hauptsach er isch zue!